
ВИЛОЯТ ҲОКИМИ БУВАЙДА ТУМАНИДА МФЙ РАИСЛАРИ ВА ПРОФИЛАКТИКА ИНСПЕКТОРЛАРИ ҲАМКОРЛИГИНИ ЯНГИ БОСҚИЧГА КЎТАРИШ ЗАРУРЛИГИГА ЭЪТИБОР ҚАРАТДИ

Вилоят ҳокими Хайрулло Бозоров, кеча Бувайда туманидаги ўрганишлари жараёнида туманнинг Беглар, Қўрғонобод, Хонобод, Янгиқошлоқ ва Оқтепа маҳаллаларида профилактика инспекторлари билан мулоқот ўтказиб, уларнинг фаолиятини таҳлил қилди.

Жорий йил 31 январь куни бўлиб ўтган Халқ депутатлари вилоят, туман ва шаҳар Кенгашларининг қўшма сессиясида жиноятчиликка қарши кураш борасида вилоятдаги ҳолат танқидий муҳокама қилинганди. Вилоятда жиноятлар сони ошиб бораётгани, бу борада жойларда маҳалла раислари ҳамда профилактика инспекторлари томонидан жиноятчиликнинг олдини олишга қаратилган аниқ ва мақсадли ҳамкорлик йўлга қўйилмагани, профилактика инспекторларининг маҳаллалар ҳудудида қуриб берилган хизмат уйларида яшамаётгани қайд этилиб, профилактика инспекторларини улар хизмат ўтайдиган ҳудудга қўчиб ўтишини таъминлаш, уларнинг маҳалла фуқаролар йиғини раиси билан бир жойда фаолият олиб боришларини йўлга қўйиш бўйича вазифалар белгилаб берилганди.

Ўрганишлар давомида Бувайда туманида ҳам баъзи профилактика инспекторлари хизмат уйларида яшамаётгани кўзга ташланди. Шунингдек, профилактика инспекторлари ва маҳалла раислари билан суҳбат давомида уларнинг ўзаро ҳамкорлиги етарли йўлга қўйилмагани, аниқ қўшма иш режаси мавжуд эмаслиги, иш ҳужжатлари тўғри юритилмагани маълум бўлди.

Маҳаллада ҳуқуқбузарликларнинг олдини олиш ва жиноятчиликка қарши курашиш МФЙ раислари ҳамда бириктирилган профилактика инспекторларининг самарали ҳамкорлигига бевосита боғлиқ эканига эътибор қаратган вилоят ҳокими, жиноятга мойиллиги бор ёшлар, хотин-қизларнинг аввало муаммоларини ўрганиш, маиший муаммолари бўлса, масъул ташкилотлар орқали ёрдам бериш, руҳан қўллаб-қувватлаш борасида иш ташкил этиш юзасидан кўрсатмалар берди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-02-10 11:05:32